

«Er il chantun Grischun è periclità»

Nova epidemia da virustgel smanatscha

DA FLURIN ANDRY / ANR

■ **Dapi il december 2010 èn vegnids annunziads surtut a Basilea ed en il Vad e Genevra 403 cas da virustgel. Ils emprims indesch mais da l'onn passà avevan ins dumbrà mo 59 cas.** «Mo il mais mars han ins dumbrà en Svizra 112 cas da virustgel ed il mais avrigl 160 cas da totalmain 403 cas dapi il december», di *Jean-Louis Zurcher*, commember da la secziun communicaziun da l'Uffizi federal per la sanadad (UFS). Ils blers cas han ins constatà al cumenzament dal mais matg en ils chantuns Basilea (167 cas), Genevra e Vad (ensemèn 82 cas). Entant han ins dumbrà almain 14 cas da virustgel en ils chantuns da Turgovia e Turitg. «Cunquai ch'il virus dal virustgel è fitg contagiùs è er il chantun Grischun periclità dad ina nova epidemia da questa mal-

sogna», di *Gion Duri Deplazes*, vice-medi chantunal.

Cun consequenzas per part privlusas

Normalmain n'è la malsogna d'uffants virustgel betg privlusa, menziuna il perit, «tar en media diesch pertschient dals cas dentant poi dar cumplaziuns, numnadamain cas da puntga, pneumonia, sco era cas dad inflammaziun dal tscharvè, meningitis». Quai èn sco ch'el intuna malsognas seriusas, «ils blers dals pazients pon baingea bandunar ils ospitals puspè sauns, i po però era dar tar il meningitis cas ch'il tscharvè na sa remetta betg pli, ch'i dat donns restants.» Sco ch'el agiunscha datti mintg'onn er intginas pazientas ed intginas pazients che moran causa il virustgel. Perquai provan la Svizra ed ils auters pajais commembers da l'organisaziun mundiala per la sanadad WHO dad eliminar il vi-

rustgel en Europa fin l'onn 2015 cumplettaimain. Quai gartegia dentant mo sche almain 95 pertschient da la populaziun sa laschan vaccinar cun duas dosas. Sco che infurmescha l'UFS s'han laschads vaccinar en Svizra per entant mo 75 pertschient da la populaziun (ina dosa 90 pertschient).

«Il virustgel fiss insatge evitabel»

Il motiv per questa uschenunna da rata da vaccinaziun bassa è sco ch'il medi Gion Duri Deplazes declera la tema d'ina part dals abitants en Svizra che la vaccinaziun na saja betg natirala e fetschia donn al corp uman. Quai è tenor el ina tenuta ch'ins chattia surtut en las grondas citads e las regiuns urbanas. «Nus da la medischina da scola essan persvas che quella tema n'è betg giustifitgada», ch'els sajan anzi engraziavel da la pussaivladad da vaccinar: «Cun prender davent dal virus sia nauscha vart èsi gartegià da crear in antigen che evitescha che la malsogna prorumpa.» Uschia saja stà pussaivel dad eliminar en Svizra grazia a la vaccinaziun p. ex. la polio melitis, la paralisa infantila. En Grischun èsi sco ch'el suppona var diesch pertschient da la glieud che na laschan betg vaccinar ad els e surtut betg a lur uffants. «Sch'i fiss mo in pertschient na dessi quasi segirmain pli naginas epidemias da virustgel, ma uschia poi dar vinavant regularmain er en Grischun da quellas epidemias», concluda Gion Duri Deplazes.



Il vice-medi chantunal Gion Duri Deplazes cusseglia da vaccinar cunter il virustgel.

FOTO P. DE JONG